





玉臺新詠卷九目錄

古詞

東飛伯勞歌

越人歌

司馬相如

琴歌  
并序

烏孫公主

悲歌  
一首

蘇伯玉妻

陳東海徐陵編





盤中詩

漢成帝時童謠二首

漢桓帝時童謠一首

張衡

四愁詩

定情歌

秦嘉

贈婦

魏文帝

燕歌行二首

陳思王

妾薄命行

晉惠帝時童謠一首

張載

擬四愁詩

傅玄

歷九秋篇董桃行

車遥遥篇

燕人美兮歌

擬四愁詩四首并序



陸機

燕歌行

劉鑠

白紵曲

鮑照

代淮南王 二首

白紵歌 二首

行路難 四首

北風行

湯惠休

楚明妃曲

白紵歌

秋風歌

歌思引

陸厥

李夫人及貴人歌

釋寶月

行路難

梁武帝

河中之水歌



江南弄

龍笛曲

採菱曲

遊女曲

朝雲曲

白紵辭 二首

昭明太子

江南曲

龍笛曲

採蓮曲

梁簡文帝

烏栖曲 四首

從軍行

和蕭侍中子顯春別 四首

歷九秋篇 十首

春情 一首

擬古 一首

倡樓怨節

東飛伯勞歌 二首

梁元帝



春別應令 四首

燕歌行

烏栖曲 四首

別詩 二首

沈約

登臺望秋月

會圃臨春風

歲暮愍衰草

霜來悲落桐

夕行聞夜鶴

晨征聽曉鴻

解珮去朝市

披褐守山東

春日白紵曲

秋日白紵曲

趙瑟曲

秦箏曲

陽春曲

范靜妻沈氏

晨風行



吳筠

行路難 二首

張率

長相思 二首

白紵歌 五首

費昶

行路難 二首

蕭子顯

春別 四首

烏棲曲 三首

燕歌行

王筠

行路難

劉孝綽

代人詠見故姬

劉孝威

東飛伯勞歌

徐君蒨

別義陽郡 二首

王叔英婦劉氏



玉臺新詠卷九

庾信哀歌 一首

燕歌行

烏夜啼

怨詩

舞媚娘

徐孝穆

烏栖曲

雜曲

玉臺新詠卷九目錄終

玉臺新詠卷九

陳東海徐陵編 明歙方大法校

東飛伯勞歌

古詞

東飛伯勞西飛燕黃姑織女時相見誰家女兒  
對門居開顏發艷照里閭南窓北牖桂月光羅  
幃綺帳脂粉香女兒年幾十五六窈窕無雙顏  
如玉三春已暮花從風空留可憐與誰同

越人歌

今日何日兮舉舟中流今夕何夕兮得與王子  
同舟蒙羞被好兮不訾詬耻心幾頑而不絕兮



得知王子山有木兮木有枝心悅君兮君不知

琴歌

并序

司馬相如

司馬相如遊臨邛富人卓王孫有女文君  
新寡竊于壁間窺之相如鼓琴歌以挑之

其歌曰

鳳兮鳳兮歸故鄉遨遊四海求其凰時未遇兮  
無所將何悟今夕兮昇斯堂有艷淑女兮在閨  
房室近人遐獨我傷何緣交頸爲鴛鴦胡頡頏  
兮共翱翔

鳳兮鳳兮從我栖得託葦尾永爲妃交情通意

心和諧中夜相從知者誰雙翼俱起翻高飛無  
感我心使余悲

悲歌

一首并序

烏孫公主

漢武帝元封中以江都王女細君爲公主  
嫁與烏孫昆彌至國而自治宮室歲時一  
再會言語不通公主悲愁自作歌曰

吾家嫁我兮天一方遠託異國烏孫王窮蘆爲  
室羶爲牆以肉爲食兮酪爲漿常思漢土兮心  
內傷願爲黃鵠兮歸故鄉

盤中詩

蘇伯玉妻



山樹高鳥鳴悲泉水深鯉魚肥空倉鵲常苦飢  
吏人婦會夫希出門望見白衣謂當是而更非  
還入門中心悲北上堂西入階急機絞杼聲催  
長歎息當語誰君有行妾念之出有日還無期  
結中帶長相思君忘妾未知之妾忘君罪當治  
妾有行宜知之黃者金白者玉高者山下者谷  
姓者蘇字伯玉人才多智謀足家居長安身在  
蜀何惜馬蹄歸不數羊肉千斤酒百斛令君馬  
肥麥與粟今時人智四足與其書不能讀當從  
中央周不角

童謠二首

并序

漢成帝時

成帝趙后名飛燕寵幸冠于後宮常從帝  
出遊時富平侯張放亦稱佞幸爲期門之  
遊故歌云張公子時相見也飛燕嬌妬成  
帝無子故云琢皇孫華而不實王莽自云  
代漢德者土色尚黃故云黃雀飛鷲竟以  
廢死故爲人所憐也

其一

燕燕尾涎涎張公子時相見木門倉琅根鷲飛  
來琢皇孫皇孫死燕琢夫



其二  
桂樹花不實黃雀巢其顛昔爲人所愛今爲人所憐

童謠一首

漢桓帝時

小麥青青大麥枯誰當獲者婦與姑丈夫何在  
西擊胡吏買馬君具車請爲諸君鼓隴胡城上  
烏尾畢逋公爲吏兒爲徒一徒死百乘車車班  
班至河間河間姹女能數錢以錢爲室金爲堂  
石上膾膾舂黃梁黃梁之下有懸鼓我欲擊之  
丞相怒

四愁詩

張衡

其一

我所思兮在太山欲往從之梁甫艱側身東望  
涕沾翰美人贈我金錯刀何以報之英瓊瑤路  
遠莫致倚逍遙何爲懷憂心煩勞

其二

我所思兮在桂林欲往從之湘水深側身南望  
涕沾襟美人贈我金琅玕何以報之雙玉盤路  
遠莫致倚惆悵何爲懷憂心煩傷

其三



我所思兮在漢陽欲往從之壠坂長側身西望  
涕沾裳美人贈我貂襜褕何以報之明月珠路  
遠莫致倚踟躕何爲懷憂心煩紆

其四

我所思兮在鴈門欲往從之雪紛紛側身北望  
涕沾巾美人贈我錦繡段何以報之青玉案路  
遠莫致倚增歎何爲懷憂心煩惋

定情歌

大火流兮草虫鳴繁霜降兮草木零秋爲期兮  
時已征思美人兮愁屏營

贈婦

秦嘉

曖曖白日引曜西傾啾啾雞雀群飛赴楹皎皎  
明月煌煌列星嚴霜淒愴飛雪覆庭寂寂獨居  
寥寥空室飄飄短帳熒熒華燭爾不是居帷帳  
何施爾不是照華燭何爲

燕歌行二首

魏文帝

其一

秋風蕭瑟天氣涼草木搖落露爲霜群燕辭歸  
鴈南翔念君客遊多思腸慊慊思歸戀故鄉君  
何淹留寄他方賤妾煢煢守空房憂來思君不



敢忘不覺淚下沾衣裳援琴鳴絃發清商短歌  
微吟不能長明月皎皎照我床星漢西流夜未  
央牽牛織女遙相望爾獨何辜限河梁

其二

別日何易會日難山川悠遠路漫漫鬱陶思君  
未敢言寄聲浮雲往不還涕零雨面毀容顏誰  
能懷憂獨不嘆展詩清歌聊自寬樂往哀來催  
肺肝耿耿伏枕不能眠披衣出戶步東西仰看  
星月觀雲間飛鶴晨鳴聲可憐留連顧懷不能  
存

妾薄命行

陳思王

日月既逝西藏更會蘭室洞房花燭步帳輝煌  
皎若日出扶桑促樽合坐行觴主人起舞盜盤  
能者宥觸別端騰觚飛爵闌干同量等色齊顏  
任意交屬所歡朱顏發外形蘭袖隨禮客極情  
妙舞仙仙體輕裳解履遺絕纓俛仰笑喧無呈  
覽持佳人玉顏齊接金爵翠盤手形羅袖良難  
腕弱不勝珠環坐者嘆息舒顏御巾衰粉君傍  
中有霍納都梁雞舌五味雜香進者何人齊姜  
恩重愛深難忘召延親好宴私但歌杯來何遲



客賦既醉言歸主人稱露未稀

童謡一首

晉惠帝時

鄴中女子莫千妖前至三月抱胡腰

擬四愁詩

張載

其一

我所思兮在南巢欲往從之巫山高登崖遠望  
涕泗交我之懷矣心傷勞佳人遺我筒中布何  
以贈之流黃素願因飄風超遠路終然莫致增  
永慕

其二

我所思兮在朔涓欲往從之白雲霏登崖遠望  
涕泗垂我之懷矣心傷悲佳人遺我雲中翮何  
以報之連城璧願因歸鴻超遐翮終然莫致增  
永積

其三

我所思兮在隴原欲往從之隔太山登崖遠望  
涕泗連我之懷矣心傷煩佳人遺我雙角端何  
以贈之雕玉環願因行雲超重巒終然莫致增  
永歎

其四



我所思兮在營州欲往從之路阻修登崖遠望  
涕泗流我之懷矣心傷憂佳人遺我綠綺琴何  
以贈之雙南金願因流波超重深終然莫致增  
永吟

歷九秋篇董桃行二首

傳玄

其一

綠綉領兮含暉皎日迴光則微朱華忽爾漸衰  
影欲捨形高飛誰言往恩可追

其二

薺與麥兮夏零蘭桂踐霜逾馨祿命緣天難明

委心結意丹青何憂君心中傾

車遥遥篇

車遥遥兮馬洋洋追思君兮不可忘君安遊兮  
西入秦願爲影兮隨君身君在陰兮影不見君  
依光兮妾所願

燕人美兮歌

燕人美兮趙女佳其室則邇兮限層崖雲爲車  
兮風爲馬玉在山兮蘭在野雲無期兮風有止  
思心多端兮誰能理

擬四愁詩四首并序



張平子作四愁詩體小而俗七言類也聊  
擬而作之名曰擬四愁詩

其一

我所思兮在瀛洲願爲雙鵠戲中流牽牛織女  
期在秋山高水深路無由愍余不遘嬰殷憂佳  
人貽我明月珠何以要之比目魚海廣無舟悵  
勞劬寄言飛龍天馬駒風起雲披飛龍逝波滔  
天兮馬不儻何爲多念心憂世

其二

我所思兮在珠崖願爲比翼浮清池剛柔合德  
配二儀形影一絕長別離愍余不遘情如携佳  
人貽我蘭蕙草何以要之同心鳥火熱水深憂  
盈抱申以琬琰夜光寶卞和旣沒玉不察存若  
流光忽電滅何爲多念獨鬱結

其三

我所思兮在崑山願爲鹿蛭闕虞淵日月迴曜  
照景天參辰曠隔會無緣愍余不遘罹百艱佳  
人遺我蘇合香何以要之翠鴛鴦懸度弱水川  
無梁申以錦衣文綉裳三光騁邁景不留鮮似  
民生忽若浮何爲多念祗自愁



其四

我所思兮在朔方願爲飛燕俱南翔煥乎人道  
著三光胡越殊心生異鄉愍余不遘罹百殃佳  
人遺我葆羽纓何以要之影與形求增憂結繁  
華零申以日月指明星星辰有翳日月移駑馬  
哀鳴慙不馳何爲多念心自虧

燕歌行

陸機

四時代序逝不追秋風習習落葉飛蟋蟀在堂  
露盈墀念君遠遊常苦悲君何緬然久不歸賤  
妾悠悠心無違白日旣沒明燈輝寒禽赴林匹

鳥栖雙鳩關關宿河湄憂來感物涕不晞非君  
之念思爲誰別日何早會何遲

白紵曲

劉鑠

遷遷徐動何盈盈玉腕俱疑若雲行佳人舉袖  
耀清蛾摻摻擢手映鮮羅狀似明月汎雲河體  
如輕風動流波

代淮南王

二首

鮑昭

其一

淮南王好長生服食鍊氣讀仙經琉璃作枕牙  
作盤金鼎玉七合神丹合神丹戲紫房紫房綵



女弄明璫鸞歌鳳舞斷君腸

其二

朱城九門門九閨願逐明月入君懷入君懷結  
君珮怨君恨君恃君愛築城思堅劍思利同盛  
同衰莫相棄

白紵歌 二首

其一

朱唇動素袖舉洛陽少年邯鄲女古稱綠水今  
白紵催絃急管爲君舞窮秋九月荷葉黃北風  
驅鴈天雨霜夜長酒多樂未央

其二

春風澹蕩俠思多天色淨綠氣妍和桃含紅萼  
蘭紫芽朝日灼爍發園葩卷幌結幃盈玉筵齊  
謳秦吹盧女絃千金顧笑買芳年

行路難 四首

其一

中庭五株桃一株先作花陽春妖冶二三月從  
風簸蕩落西家西家思婦見之惋零淚沾衣撫  
心嘆初送我君出戶時何意淹留節迴換牀席  
生塵明鏡垢織腰瘦削髮蓬亂人生不得常稱



意惆悵徒倚至夜半

其二

劉蘂染黃絲黃絲歷亂不可治昔我與君始相  
值爾時自謂可君意結帶與我言死生好惡不  
相置今日見我顏色衰意中索寞與先異還君  
金釵玳瑁簪不忍見此益愁思

其三

奉君金卮之旨酒玳瑁玉匣之雕琴七彩芙蓉  
之羽悵九華葡萄之錦衾紅顏零落歲將暮寒  
光宛轉時欲沉願君裁悲且減思聽我抵節行

路吟不見栢梁銅雀上寧聞古時清吹音

其四

璿閨玉遲上椒閣文窓綉戶垂羅幙中有一人  
字金蘭被服織羅採芳藿春燕差池風散梅開  
帷對影弄春爵含歌攬涕不能言人生幾時得  
為樂寧作野中之雙鳧不願雲間之別鶴

北風行

北風涼雨雪雱京洛女兒多妍粧遙艷惟中自  
悲傷沉吟不語若為忘問君何行何當歸苦使  
妾坐自傷悲慮年去慮顏衰情易復恨難追



楚明妃曲

湯惠休

瓊臺彩楹桂寢雕甍金閨流耀玉牖含英香芬  
幽藹珠彩珍榮文羅秋翠紈綺春輕驂駕鸞鶴  
往來仙靈含姿綿視微笑相迎結蘭枝送目成  
當年爲君榮

白紵歌

少年窈窕舞君前容華艷艷將欲然爲君嬌疑  
復遷延流目送笑不敢言長袖拂面心自煎願  
君流光及盛年

秋風歌

秋風嫋嫋入曲房羅帳含月思心傷蟋蟀夜鳴  
斷人腸長夜思君心飛揚他人相思君相忘錦  
衾瑤席爲誰芳

歌思引

秋寒依依風過河白露蕭蕭洞庭波思君末光  
光已滅眇眇悲望如思何

李夫人及貴人歌

陸厥

屬車挂席塵豹尾香煙滅彤殿向薜蘿青蒲復  
萎絕坐萎絕對薜蘿臨玉階泣長途寡鶴羈雌  
飛且止雕梁翠壁網蜘蛛洞房明月夜對此淚



如珠

行路難

釋寶月

君不見孤鴈關外發酸嘶度揚越空城客子心  
腸斷幽閨思婦氣欲絕凝霜夜下拂羅衣浮雲  
中斷開明月夜夜遙遙徒相思年年望望情不  
歇寄我匣中青銅鏡倩人爲君除白髮行路難  
行路難夜聞南城漢使度使我流淚憶長安

河中之水歌

梁武帝

河中之水向東流洛陽女兒名莫愁莫愁十三  
能織綺十四採桑南陌頭十五嫁爲盧家婦十

六生兒字阿侯盧家蘭室桂爲梁中有鬱金蘇  
合香頭上金釵十二行足下絲履五文章珊瑚  
掛鏡爛生光平頭奴子擎履箱入生富貴何所  
望恨不早嫁東家王

江南弄

衆花雜色滿上林舒芳耀綠垂輕陰連手躑躅  
舞春心舞春心臨歲臆中人望獨踟躕

龍笛曲

美人緜眇在雲堂雕金鏤竹眠玉牀婉愛寥亮  
繞紅梁繞紅梁流月臺駐狂風鬱徘徊



採菱曲

江南稚女珠腕繩金翠  
搔首紅顏興桂棹容與  
歌採菱歌採菱心未怡  
翳羅袖望所思

遊女曲

氛氲蘭麝體芳滑容色玉  
耀眉如月珠珮嫋嫋  
戲金闕戲金闕遊紫庭  
舞飛閣歌長生

朝雲曲

張樂陽臺歌上歇如寢如興  
若晻曖容光旣艷  
復還沒復還沒望不來  
巫山高心徘徊

白紵辭

二首

其一

朱絲玉柱羅象筵飛瑄促節舞少年  
短歌流目未肯前含笑一轉私自憐

其二

纖腰嫋嫋不任衣嬌態獨立特爲誰  
赴曲君前未忍歸上聲急調中心飛

江南曲

昭明太子

枝中水上春併歸長楊掃地桃花飛  
清風吹人光照衣光照衣景將夕  
擲黃金留上客

龍笛曲



金門玉堂臨水居一嘔一笑千萬餘遊子去還  
願莫踈願莫踈意何極雙鷺鴛鴦兩相憶

採蓮曲

桂楫蘭橈浮碧水江花玉面兩相似蓮踈藕折  
香風起香風起白日低採蓮曲使君迷

烏栖曲

四首

梁簡文帝

其一

芙蓉作船絲作紵北斗橫天月將落採蓮渡頭  
擬黃河郎今欲度畏風波

其二

浮雲似帳月如鈎那能夜夜南陌頭宜城醞酒  
今行熟停鞍繫馬暫栖宿

其三

青牛丹轂七香車可憐今夜宿倡家倡家高樹  
烏欲栖羅幃翠帳向君低

其四

織成屏風金屈膝朱唇玉面燈前出相看氣息  
望君憐誰能含羞不自前

從軍行

雲中停陣羽檄驚甘泉烽火通夜明貳師將軍



新築營嫖姚校尉初出征復有山西將絕世受  
雄名三門應遁甲五壘學神兵白雲隨陣色蒼  
山荅鼓聲逶迤觀鵝翼參差覩鴈行先平小月  
陣却滅大宛城善馬還長樂黃金付水衡小婦  
趙人能鼓瑟侍婢初笄解鄭聲庭前桃花飛已  
合必應紅粧起見迎

和蕭侍中子顯春別 四首

其一

別觀葡萄帶實垂江南豆蔻生連枝無情無意  
猶如此有心有恨徒自知

其二

蜘蛛作絲滿帳中芳草結葉當行路紅臉脉脉  
一生啼黃鳥飛飛有時度故人雖故昔經新  
人雖新復應故人雖新復應故

其三

可憐淮水去來潮春堤楊柳覆河橋淚痕未燥  
詎終朝行聞玉佩已相要

其四

桃紅李白若朝粧羞持顚顚比新楊不惜暫往  
君前死愁無西國更生香



歷九秋篇 十首

其一

歷九秋兮三春遺貴客兮遠賓顧多君心所親  
乃命妙妓才人炳若日月星辰

其二

序金壘兮玉觴賓主迤起鴈行杯若飛電絕光  
交觴接卮結裳慷慨歡笑萬方

其三

奏新詩兮夫君爛然虎變龍文渾如天地未分  
齊謳楚舞紛紛歌聲上噉青雲

其四

窮八音兮異倫竒聲靡靡每新微笑素齒丹唇  
逸響飄薄梁塵精爽眇眇入神

其五

坐咸醉兮沾歡引樽促席臨軒進對獻壽翻翻  
千秋要君一言願愛不移若山

其六

君恩愛兮不竭譬若朝日夕月此景萬里不絕  
長保初醮結髮何憂坐生胡越

其七



携弱手兮金環上游飛閣雲間穆若鴛鳳雙鸞  
還幸蘭房自安娛心極樂難原

其八

樂既極兮多懷盛時忽逝若頽寒暑御景廻  
春榮隨風飄摧感物動心增哀

其九

妾受命兮孤虛男兒墮地稱妹女弱難存若無  
骨肉至親更踈奉事他人託軀

其十

君如影兮隨形賤妾如水浮萍明月不能常盈

誰能無根保榮良時冉冉代征

春情

蝶黃花紫燕相追楊低柳合路塵飛已見垂鈎  
挂綠樹誠知淇水沾羅衣兩童夾車問不已五  
馬城南猶未歸鶯啼春欲駛無爲空掩扉

擬古

窺紅對鏡斂雙眉含愁拭淚坐相思念人一去  
許多時眼語笑靨迎來情心懷心想甚分明憶  
人不忍語含恨獨吞聲

倡樓怨節



朝日斜來照戶春鳥爭飛出林片光片影皆麗  
一聲一轉煎心上林紛紛花落淇水漠漠苔浮  
年馳節流易盡何爲忍憶含羞

東飛伯勞歌 二首

其一

翻堦蛺蝶戀花情容華飛燕相逢迎誰家總角  
岐路陰裁紅點翠愁人心天牕綺井暖徘徊珠  
簾玉篋明鏡臺可憐年幾十三四工歌巧舞入  
人意白日西落楊柳垂含情弄態兩相知

其二

西飛迷雀東羈雉倡樓秦女乍相值誰家妖麗  
隣中止輕粧薄粉光間里網戶珠綴曲瓊鈎芳  
茵翠被香氣流少年年幾方三六含嬌聚態傾  
人目餘香落蕊坐相催可憐絕世誰爲媒

春別應令 四首

梁元帝

其一

昆明夜月光如練上林朝花色如霰花朝月夜  
動春心誰忍相思不相見

其二

試看機上蛟龍錦還瞻庭裏合歡枝映日通風



隱朱幔飄花搖葉度金池不聞離人當重合唯  
悲合罷會成離

其三

門前楊柳亂如絲直置佳人不自持適言新作  
裂紉詩誰悟今成織素辭

其四

日暮徙倚渭橋西正見流月與雲齊若使月光  
無近遠應照離人今夜啼

燕歌行

燕趙佳人本自多遼東少婦學春歌黃龍戍北

花如錦玄兔城前月似蛾如何此時別夫婿金  
羈翠眊往交河還聞入漢去燕營怨妾心中百  
恨生漫漫悠悠天未曉遙遙夜夜聽寒更自從  
異縣同心別偏恨同時成異節橫波蒲臉萬行  
啼翠眉漸歛千重結并海連天合不開那堪春  
日上春臺惟見遠舟如落葉復看遙舸似行杯  
沙汀夜鶴嘯羈雌妾心無趣坐傷離翻嗟漢使  
音塵斷空傷賤妾燕南陲

烏栖曲 四首

其一



沙棠作船桂爲楫夜渡江南採蓮葉復值西施  
新浣紗共汎江干瞻月華

其二

月華似璧星如珮流影燈明玉堂內邯鄲九投  
朝始成金卮銀椀共君傾

其三

交龍成錦鬪鳳紋芙蓉爲帶石榴裙日下城南  
兩相望月沒參橫掩羅帳

其四

七彩隋珠九華玉蛺蝶爲歌明星曲蘭房椒閣

夜方開那知步步香風逐

別詩二首

其一

別罷花枝不共攀別後書信不相關欲覓行人  
寄消息衣帶潮水暝應還

其二

三月桃花含面脂五月新油好煎澤莫復臨時  
不寄人漫道江中無估客

登臺望秋月

沈約

望秋月秋月光如練照耀三爵臺徘徊九華殿



九華玳瑁梁華攘與璧璫以茲雕麗色特照明  
月光凝華入黼帳清輝懸洞房先過飛燕戶却  
照班姬床桂宮裊裊落桂枝早寒淒淒凝白露  
上林晚葉颯颯鳴鴈門早鴻離離度湛秀質兮  
似規委清光兮如素照愁軒之蓬影映金堦之  
微步居人臨此笑以歌別客對之傷且暮經衰  
圃映寒叢凝清夜帶秋風隨庭雪以比素與池  
荷而共紅臨玉堦之皎皎含雪霽之濛濛輔天  
衢而從度轆長漢而飛空隱巖崖而半至隔帷  
幌而纔通散朱庭之燦燦入青瑣而玲瓏閑堦

悲寡鵠沙洲怨別鴻昭姬泣胡殿明君思漢宮  
余亦何爲者淹留此山東

會圃臨春風

臨春風春風起春樹遊絲暖如網落花霧似霧  
先泛天淵池還過細柳枝蝶逢飛搖颺燕值羽  
差池揚桂旆動芝蓋開燕裾吹趙帶趙帶飛參  
差燕裾合且離迴簪復轉黛顧步惜容儀容儀  
已炤灼春風復迴薄氛氲桃李花青枝含素萼  
既爲風所開復爲風所落搖綠帶枕紫莖舞春  
雪雜流鶯曲房開兮金鋪響金鋪響兮妾思驚



梧桐未陰淇川始碧迎行雨于高唐送歸鴻於  
碣石經洞房響紈素感幽閨思帷密想芳園兮  
可以遊念蘭翹兮漸堪摘拂明鏡之冬塵解羅  
衣之秋襪既鏗鏘以動珮又網緼而流麝始搖  
蕩以入閨終徘徊而緣隙鳴珠簾於綉戶散芳  
塵于綺席是時悵思婦安能久行役佳人不在  
茲春風與誰惜

歲暮愍衰草

愍衰草衰草無容色憔悴荒逕中寒萎不可識  
昔時兮春日昔日兮春風含華兮佩實垂綠兮

散紅氛氲鳩鵲右照曜望仙東送歸顧慕泣淇  
水嘉客淹留懷上宮巖陬兮海岫冰多兮霧散  
爛熳兮巖根攢幽兮石隙布綿密于寒臯吐纖  
踈于危石旣惆悵于君子倍傷心于行役露高  
枝于初旦霜江天於始夕彫芳卉之九衢寶靈  
茅之三春風急崑路難秋至客衣單旣傷簷下  
菊復悲池上蘭飄落逐風轉方知歲早寒流螢  
暗明燭鴈聲斷纔續委綴長信宮蕪穢丹墀曲  
霜奪莖上紫風銷葉中綠山巒兮水圍青薇兮  
黃葦秋鴈嘹兮踈引寒鳥聚兮輕飛逕荒寒草



合相長舊巖圍夜漸靡蕪沒霜露日沾衣願逐  
晨征鳥薄暮共西歸

霜來悲落桐

悲落桐落桐早霜露燕至葉未抽鴻來枝已素  
本出龍門山長枝仰刺天上峯百丈絕下趾萬  
尋懸幽根已盤結孤株復危絕初不照光景終  
年負霜雪自顧無羽儀不願生曲池芬芳本自  
乏華實無可施匠者時留盼王孫少見之自分  
孤生卉徙置北堂陞宿莖抽晚幹新葉生故枝  
故枝雖遼遠新葉頗離離春風一朝至榮華坐

如斯自惟良菲薄君恩徒照灼顧已非嘉樹宜  
用憑阿閣願作清廟琴爲舞雙玄鶴薜荔可爲  
裳文杏可爲梁勿言草木賤徒照君末光末光  
不徒照爲君含噉眺陽阿綠水弦陰枝苦寒調  
厚德不可任敢不虛其心若逢陽春至吐綠照  
清潯

夕行聞夜鶴

聞夜鶴夜鶴叫南池對此孤明月臨風振羽儀  
伊吾人之菲簿無賦命之天爵抱跼促而長懷  
隨冬春而哀樂愍海上之驚鳧傷雲間之離鶴



離鶴昔未離近發天北垂忽值疾風起暫下昆  
明池復值冬水合水宿非所宜欲留不可住欲  
去飛已疲勢逐疾風舉求溫向衡楚復值南飛  
鴻參差共成侶海上多雲霧蒼茫失洲嶼自此  
別故群獨向瀟湘渚故群不離散相依蒼海畔  
夜止羽相切晝飛影相亂刷羽共浮沉湛澹泛  
清潯既不經離別安知慕侶心九冬霜雪苦六  
翮飛不任且養凌雲翅俛仰弄清音所望浮丘  
子旦夕來見尋

晨征聽曉鴻

聽曉鴻曉鴻度將旦跨弱水之微瀾發成山之  
遠岸怵春歸之未幾驚北歲之云半出海漲之  
蒼茫入雲途之杳漫無東西之可辨孰遐邇之  
能算微昔見于洲渚赴秋期於江漢集勁風於  
弱軀負重雪於輕翰寒溪可以飲荒臯可以竄  
溪水徒自清微形豈足翫秋蓬萎兮未絕塞草  
衰兮無色楚山高兮杳難度越水深兮不可測  
美明月之馳光顧征禽之騁翼伊余馬之屢懷  
知君行之未極夜綿綿而難曉愁參差而盈臆  
望山川悉無以惟星河猶可識孤鴈夜南飛客



淚夜沾衣春鴻思暮反客子方未歸歲去懽娛  
盡年來容貌非攬衽形雖是撫臆事多違青蒲  
雖長復易鮮白雲誠遠詎難依

鮮佩去朝市

去朝市朝市深歸暮辭北纓而南徂浮東川而  
西顧逢天地之降祥值日月之重光伊當仁之  
菲薄非余情之信芳充待詔於金馬眷齊宴於  
栢梁觀鬪鷄于虎圈望窈窕于披香遊西園兮  
登銅雀舉青璫兮眺重陽講金華兮議宣室晝  
武惟兮夕文昌佩甘泉兮履五柞贊朽諧弓紱

冕光託后車兮侍華幄遊渤海兮泛青漳天道  
有盈缺寒暑逝炎涼一朝賣玉腕春暮惜餘香  
曲池無復處桂枝亦銷亡清廟徒肅肅西陵又  
茫茫薄暮余多幸嘉運重來昌泰稽部之南尉  
典千里之光貴形北荒之濁河惡橫橋于清渭  
望前軒之早桐對南階之初卉非余情之屢傷  
孰寄茲兮能慰眷昔日兮懷哉日將暮兮歸去來

披褐守山東

守山東山東萬里鬱青葱兩漢共一瀉水潔望  
如空岸側青莎被巖間丹桂叢上瞻旣隱隱下



睇亦冥濛遠林響咆獸近樹聒鳴虫路出若溪  
右泉吐金華東萬仞倒危石百丈注懸淙瀑曳  
瀉䟽電奔飛似白虹深洞含清氣漏穴吐飛風  
玉竇膏滴瀝石室乳空籠峭嶸塗彌險巖岨步  
纔通余捨平生之所愛歛暮年而斯逢此願一  
去而不還恨邦衣之未禱挹林壑之清曠事泯  
俗之紛詭幸帝德之方升值天綱之未毀既除  
舊而就新故化民而俗徙播趙俗以南徂扇齊  
風以東靡乳雉方可馴流蝗庶能弭清心矯世  
濁儉政救民侈秩蒲歸白雲淹留事芝髓

春日白紵曲

蘭葉參差桃半紅飛芳舞縠戲春風翡翠群飛  
飛不息願在雲間長比翼

秋日白紵曲

白露欲凝草色黃金瑄玉桂響洞房雙心一影  
俱迴翔吐情寄君君莫忘

趙瑟曲

邯鄲竒弄出文梓縈弦急調切流徵玄鶴徘徊  
白雲起白雲起鬱披香離復合曲未央

秦箏曲



羅袖飄纚拂雕桐促柱高張散輕宮迎歌度舞  
遏歸風遏歸風止流月壽萬春歡無歇

陽春曲

揚柳垂地燕差池緘情忍思落容儀弦傷曲怨  
心自知心自知人不見動羅裙拂珠殿

晨風行

范靜妻沈氏

理檝令舟人停艫息旅薄河津念君劬勞冒風  
塵臨路揮袂淚沾巾颺流勁潤逝若飛山高帆  
急絕音微留子句句獨言歸中心熒熒將依誰  
風彌葉落永離索神徃形返情錯漠循帶易緩  
愁難却心之憂矣頗銷鑠

行路難二首

吳筠

其一

君不見上林苑中客冰羅霧縠象牙席盡是得  
意忘言者探腸見膽無所惜白酒甜鹽其如乳  
綠觴皎鏡華如碧少年持名不肯嘗安知白駒  
應過隙博山爐中百和香鬱金蘇合及都梁透  
迤好氣佳容貌經過青瑣歷紫房已入中山陰  
后帳復上皇帝班姬床班姬失寵顏不開奉帚  
供養長信臺日暮耿耿不能寐秋風切切四面



來玉階行路生細草金爐香炭變成灰得意失意  
湏臾問非君方寸逆所裁

其二

洞庭水上一株桐經霜觸浪困嚴風昔時抽心  
耀白日今日臥死黃沙中洛陽名工見咨嗟一  
剪一刻作琵琶白壁規心學明月珊瑚映面作  
風花帝王見賞不見忘提携把握登建章掩抑  
摧藏張女彈殷勤促柱楚明光年年月月對君  
王遙遙夜夜宿未央未央綵女棄鳴篳爭先拂  
拭生光儀茱萸錦衣玉作匣安念昔日枯樹枝

不學衡山南嶺桂至今千載猶未知

長相思 二首

張率

其一

長相思久離別美人之遠如雨絕獨佇心中  
結望雲雲去遠望鳥鳥飛滅空望終若斯珠淚  
不能雪

其二

長相思久別離所思何在若天垂鬱陶相望不  
得知玉階月夕映羅帷風夜吹長思不能寐坐  
望天河移



白紵歌辭 五首

其一

歌兒流唱聲欲清舞女趨節體自輕歌舞并妙  
會人情依絃度曲婉盈盈揚蛾爲態誰自成

其二

妙聲屢唱輕體飛流津染面散芳菲舉動齊息  
不相違令彼佳客澹忘歸時又翫夜月星稀

其三

秋風蕭條露垂葉空閨光盡坐愁妾獨問長安  
淚承睫山高水遠路難涉望君光景何時接

其四

日暮塞門望所思風吹庭樹月入帷涼陰旣滿  
草虫悲誰能離別長夜時流歎不寢淚如絲與  
君之別終何如

其五

愁來夜遲猶歎息撫枕思君終反仄金翠釵環  
稍不飾霧縠流黃不能織但坐空閨思何極欲  
以短書寄飛翼

行路難 二首

費昶

其一



君不見長安客舍門倡家少女名挑根貧窮夜  
紡無燈燭何言一朝奉至尊至尊離宮百餘處  
千門萬戶不知曙唯聞啞啞城上烏玉欄金井  
牽輓輻舟梁翠柱飛流蘇香薪桂火吹雕胡當  
年翻覆無常定薄命爲女何必寵

其二

君不見人生百年如流電心中坎壈君不見我  
昔初入椒房時詎減班姬與飛燕朝踰金梯上  
鳳樓暮下瓊鈎息鸞殿栢臺晝夜香錦帳自飛  
揚笙歌棗下曲琵琶陌上桑過蒙恩所賜餘光

曲沾被旣逢陰后不自專復遇班姬有所避黃  
河千年始一清微軀再逢永無議蛾眉偃月徒  
自妍傅粉施朱欲誰爲不如天淵水中鳥雙去  
雙歸長比翅

春別 四首

蕭子顯

其一

翻鶯度燕雙比翼楊柳千條共一色但看陌上  
携手歸誰能對此空相憶

其二

江東大道日華春垂楊掛柳掃輕塵淇水昨送



淚沾巾紅粧宿昔已應新

其三

銜悲攬涕別心知桃花李花任風吹本知人心不似樹何意人別似花離

其四

幽宮積草自芳菲黃鳥芳樹情相依爭風競日常聞響重花疊葉不通飛當知此時動妾思慙使羅袂拂君衣

烏栖曲 三首

其一

握中清酒碼碯鍾裾邊雜珮琥珀紅欲持寄君心不惜共指三星今何夕

其二

濃黛輕紅點花色還欲令人不相識金壺夜永誰能過莫持賒用比懸河

其三

芳樹歸飛聚儔匹猶有殘光半山日莫憚褰裳不相求漢臯遊女習飛流

燕歌行

風光遲舞出青蘋蘭苕翠鳥鳴發春洛陽梨花



落如雪河邊細柳細如茵桐生井底葉交枝今  
看無端雙燕離五重飛樓入雲漢九華閣道暗  
清池遙看白馬津上吏傳道黃龍征戍兒明月  
金光徒照妾浮雲玉葉君不知思君昔去柳依  
依至今八月避暑歸明珠蠶繭勉登機鬱金香  
鵠持香衣洛陽城頭雞欲曙丞相府中烏未飛  
夜夢征人縫狐貉私憐織婦裁錦緋吳刀鄭綿  
絡寒閨夜披薄芳年海上水中鳧日暮寒夜空  
城雀

行路難

王筠

千門皆閉夜何央百憂俱集斷人腸探揣箱中  
取刀尺拂拭機上斷流黃情人逐情雖可恨復  
畏邊遠乏衣裳已繩一罽催衣縷復擣百和薰  
衣香猶憶去時腰大小不知今日身短長兩襠  
雙心共一袜袍複兩邊作八襪襪帶雖安不忍  
縫開孔裁穿猶未達曾前却月兩相連本照君  
心不照天願君分明得此意勿復流蕩不如先  
含悲含怨判不死封情忍思待明年

代人詠見故姬

劉孝綽

留故夫不踟躕別待春山上相看採薜蘿



東飛伯勞歌

劉孝威

雙栖翡翠兩鴛鴦  
巫雲洛月乍相望  
誰家妖冶折花枝  
蛾眉曼睇使情移  
青鋪綠隙琉璃扉  
瓊筵玉筍金縷衣  
美人年幾可十餘  
含羞騁笑歛風裾  
珠丸出彈不可追  
空留可憐持與誰

別義陽郡二首

徐君倩

其一

翔鳳樓遙望與雲浮  
歌聲臨樹出舞影入江流  
葉落看村近天高應向秋

其二

飾面亭粧成更點星  
頰上紅疑淺眉心黛不青  
故留殘粉絮掛看箔簾釘

贈夫一首

王叔英妻

粧鈿點黛拂輕紅  
鳴環動珮出房櫳  
看梅復看柳淚滿春衫中

燕歌行

庾信

代北雲氣晝夜昏  
千里飛蓬無復根  
寒鴈丁丁度遼水  
桑葉紛紛落薊門  
晉陽山頭無箭竹  
踈勒城中乏水源  
屬國征戍久離居  
陽關音信絕復踈  
願得魯連飛一箭  
持寄思歸燕將書  
渡遼



本自有將軍寒風蕭蕭生水紋妾驚甘泉足烽  
火君訝漁陽少陣雲自從將軍出細柳蕩子空  
牀難獨守盤龍明鏡餉秦嘉辟惡生香寄韓壽  
春分燕來能幾日二月蚕眠不能食洛陽遊絲  
百丈連黃河春冰千片穿桃花顏色好如馬榆  
莢新開巧似錢葡萄一杯千日醉無事九轉學  
神仙定取金丹作幾服能令華表得千年

烏夜啼

促柱繁絃非子夜歌聲舞態異前溪御史府中  
何處宿洛陽城頭那得棲彈琴蜀郡卓家女織

錦秦川竇氏妻詎不自驚長淚落到道啼烏恒  
夜啼

怨詩

家住金陵縣前嫁得長安少年回頭望卿淚落  
不知何處天邊胡塵幾日應盡漢月何時更圓  
爲君能歌此曲不覺心隨斷絃

舞媚娘

朝來戶前照鏡含笑盈盈自看眉心濃黛直點  
額角輕黃細安祗疑落花謾去復道春風不還  
少年惟有懽樂飲酒那得留殘



烏栖曲

徐孝穆

繡帳羅幃隱燈燭一夜千年猶不足惟憎無賴  
汝南雞天河未落猶爭啼

雜曲

傾城得意已無儔洞房連閣未消愁宮中本造  
鴛鴦殿爲誰新起鳳凰樓綠黛紅顏兩相發千  
嬌百念情無歇舞衫迴袖勝春風歌扇當窓似  
秋月碧玉宮妓自翩妍絳樹新聲自可憐張星  
舊在天河上從來張姓本連天二八年時不憂  
度傍邊得寵誰相妬立春歷日自當新正月春

幡底須故流蘇錦帳挂香囊織成羅幌隱燈光  
只應私將琥珀枕瞑瞑來上珊瑚牀

玉臺新詠卷九終



圖書

三  
三  
三



